

武定詩續鈔

九十一

14
743
20



44
743
20



武定詩續鈔卷九

利津李佐賢竹朋編輯

張映漢

字星槎號筠圃海豐人經德公從弟乾隆甲辰進士由

主事官至兩湖總督郡志名臣傳映漢初任湖北巡道

無悞晉升至湖北巡撫時林逆殄滅楚北教匪以脅誘

被逮者數百人詳為審訊株連者概請免罪民心帖然

仕至兩湖總督德威並著內任刑部侍郎倉場總督致仕卒於家國史有傳

寄怡菴弟

粗率四百字。參差詩八首。詩中見我心。字中見我手。君望我登

武定詩續鈔

卷九

臨我懷君把酒書罷鴻雁飛。秋風吹戶牖。

神仙

王質採樵遇神仙。觀棋柯爛倏百年。令威化鶴復來歸。城郭轉盼人民非。秦皇漢武樂未足。惟願長生受仙籙。當年只恨未飛昇。豈知仙家歲月更局促。

新婦詞

貧家女。閨中日日勤機杼。一旦嫁王孫。幽閒嘗自許。拜罷堂前問姊妯。君家婦道宜何是。孰知棲身貴人家。不重荆布重鉛華。空憐妾有冰雪質。轉恨不如桃李花。新婦生長歎。此時心緒亂。

何去復何從。妾身難爲容。

讀白香山詩

古體百篇真典麗。放言五首最縱橫。莊騷已去成遺響。風雅猶留此正聲。那許老元偷格律。未容短李效歌行。不知兜律天何處。此調無從問太清。

放言 鈔一

癡想鳴珂游帝都。還思絕粒上天衢。朱門罷掃荆榛滿。華表重來景物殊。人世功名皆夢幻。仙家歲月亦須臾。甘羅命促錢鏗壽。說向無生總是無。

過恨這關

年來蹤跡徧塵寰。此日重經恨這關。不解古人何事恨。夕陽流水日潺潺。

效玉臺體

睡餘曉夢起徘徊。嬾整殘妝對玉臺。鄰女不知人意緒。相邀同去看花來。

韓天驥

字雲臯。號逢伯。霑化人。乾隆己酉進士。官沐陽知縣。著

皖江淮陽雲臯等草。儀徵阮文達公序。君生平肆力於社並心儀其人。因自號浣花小吏。

凡閱歷贈答無一不取之於杜。偶有所感。即應心而出。有不煩繩削而自合者。○余秋門明府山左詩集。鈔先生哲孫陸塘庫使寄到存稿止集杜一體。然機抽天成。毫無聯綴之跡。亦黃唐堂香屑集朱竹垞蕃錦詞之流也。

春日皖城書懷 集杜

迢遞起層陰。孤城隱霧深。別離驚節換。去住損春心。江國踰千里。家書抵萬金。欲歸歸未得。感動一沈吟。

宣命前程急。不辭辛苦行。天寒邵伯樹。野曠呂蒙營。無復隨高鳳。胡為慕大鯨。應論十年事。歛使寸心傾。

塵滿萊蕪甌。貂餘季子裘。百年從萬事。一酌散千愁。野潤烟光

薄江喧水氣浮。藩籬頗無限。吾道在滄洲。

進退委行色。淹留見俗情。老年當道路。總角愛聰明。指諸孫輩日晚

烟花亂宵深。露氣清。半扉開燭影。高枕遠江聲。

蓋方泌

字春舫。蒲臺人。乾隆己酉拔貢。官至臺灣知府。著春舫

詩鈔

青崗礪

谷口三十里。言上青崗礪。茂草深過人。蒙茸不可翦。陵盤勢紆。曲腸迴折九轉。側足常恐墜。拾級身已倦。自卑而登高。中道數

游衍。回視渭河流。烟樹分隱顯。蒼翠疊千巖。絕頂望青巘。微聞輿人言。前行路更寒。叱馭記王尊。吾亦當自勉。

老君嶺

凌晨云行邁。峻極老君嶺。上亘林與巒。其道阻且永。輿夫苦攀援。率曳資長綆。枯木橫杈枒。竹簡紛藜蕤。罡風急獵鳴。危石蹲虎猛。陰崖生晝寒。青天失日影。嗟我亦何為。履此無人境。豈不憚高深。登臨時自省。

雜詩鈔二

萬物如蜩翼。恣睢恒多尤。茅茨安華屋。緼袍麗裘裘。寒泉旨醕

醜藜藿逾珍羞。維彼象有齒。乃致焚身憂。維彼雉有尾。乃中犧

牲求。金谷尚奢侈。終為奴輩謀。瓠落無所容。非不枵然大。乃恐用之拙。浮樽江湖外。虛蕩亦何

至家

壯志在四方。離家事游宦。今朝喜歸期。笑語多親串。故老存幾人。總角各已弁。車馬動閭里。知我辭金殿。摳衣趨北堂。殷勤省寢膳。老母聞我來。坐起出庭院。問行幾日程。拭我風塵面。兒輩如迎客。中堂列清醺。更番忽進爵。肴核紛供饌。筵罷還添燭。坐

久不知倦。獨此遠歸人。庭幃深依戀。

峽石驛 即古嶠地

聞道嶠函谷。驅車此日過。河山三晉險。風雨二陵多。石確磨輪鐵。泉聲沸澗阿。何年經戰伐。古意寄烟蘿。

送高別駕入覲

遙聞車馬動雙旌。雨雪霏霏正北行。燕趙從來多壯士。關山到處感離情。豈惟望闕朝天貴。更有還鄉衣錦榮。祖道青門人贈策。登仙誰不羨班生。

送紅圃太守移任興安

人生歲月苦蹉跎。動賦驪駒感奈何。海內如君知己少。天涯有淚向誰多。幾同夜半聞雞舞。最憶樽前對酒歌。此別應須各努力。中原猶未息干戈。

己巳冬除日余至都門與杜石樵待講時得過從見贈賦

和鈔一

霏霏雨雪駐征輪。歲事將闌序轉春。擊筑燕臺尋酒伴。看花帝里有詩人。文章聲價中朝貴。詞苑頭銜寵命新。獻賦幾回邀睿賞。知君綵筆是前因。

山中晚行

籃輿幾度此山阿。落日西風惆悵過。嶺上白雲吹不盡。一林霜葉雁聲多。

張映蛟

字得雨。號怡菴。海豐人。筠圃公弟。乾隆甲寅恩科舉人。官至辰永沅靖道。著桃鴨隨筆。郡志名臣傳。映蛟任滋事。親督兵往捕。立就擒獲。沅陵有黔中亡命數千人。私挖金沙。論以利害。眾悉解散。各苗寨多設義學。苗民翕然向化。致仕後。周恤戚族。耆德碩望。咸欽式之。年八十四歲卒。入祀鄉賢祠。○鄉諡文靖。

和友人原韻

回首前蹤汗漫游。北平南越馬蹏周。行藏底事頻窺鏡。雲樹懷

人獨倚樓。今夕談心古密郡。去年得渡大江頭。此生蹤跡渾難定。一任青萍逐水流。

六

綦 澧

字匯東。利津人。乾隆壬子舉人。嘉慶丙辰。欽賜檢討。

著四書會解。周禮輯要。還齋堂文稿。醫宗輯要。郡志入文苑傳

清明後五日登千佛山

獨酌高亭餞暮春。四圍山色總宜人。天垂嶺外低羣樹。村隱烟中結遠隣。崩劣華峯遙作障。滌洄灤水近環闈。無窮勝概頻經目。一次登攀一次新。

王所禮

字敬齋。號虛谷。樂陵人。乾隆甲午優貢。官淮安中河通

判。以孫榮第。贈河南布政使。著春暉堂詩。趙宮贊未

誌公貢成均。考主簿補商邱。遷濟甯州判。丙午歲飢。捐未施粥。丁未遷睢州。同戊申。遷東昌。上河通判。汶河淤淺。早夜疏導。漕運以通。庚戌。河漲。水注城內。公設法防堵。宣洩。民免墊溺。調江南。中河通判。陞同知。引疾歸。奉母侍養。所以娛親心者。無不至。彌留時。猶以不得盡職為恨。可謂純孝矣。

北極臺

振衣登高臺。拂石坐前廡。豈知在塵界。而得此淨土。北渚落霞明。南山孤雲吐。松風飄鶴毳。花雨落階礎。梵唄寂不聞。殿角一

式定詩賣少

卷九

春晚

鈴語
心事闌珊候。年光付水流。落花迴客夢。細雨織春愁。破悶憑開卷。懷人懶上樓。行蹤飄泊甚。愧煞海邊鷗。

歸計已成寫懷

歲月銷磨是此官。都將一枕付邯鄲。病多漫道抽身易。恩重方知稱職難。吟到池塘初入夢。捧來菽水有餘歡。斑斕好慰門閭望。莫作還鄉衣錦看。

宣房榑竹重河渠。愧我無才賦遂初。雞肋情懷原若此。鱸菴風

味近何如。廿年烏帽雙蓬髻。千里青山兩麓書。漫道出園蕪廢甚。猶存松菊即吾廬。

濟南竹枝詞 鈔五

蓋世才名一劫塵。桃根桃葉不成春。青山白雪吟魂在。無復當年賣餅人。
李滄溟歿後。姬蔡氏貧居委巷十餘年。以賣餅爲業。

萬竹園空未有亭。當年暗水帶春星。書生閣老俱黃土。廢井荒畦菜甲青。
園向屬殷尙書。後歸王進士秋史。王詩云。百年竟入書生手。滿郡猶呼閣老亭。

鬪草尋芳出郭門。歸來暮雨近黃昏。踏青不到秋娘墓。小字風流已斷魂。
千佛山下。有秋娘墓碑。

湖波灩灩柳穆穆。春到橋邊水蔚藍。亞字闌干鴨嘴艇。依稀風景似江南。
如酥小雨淨微囂。光透珠簾日影高。節到清和慵未起。賣花聲過賣櫻桃。

王所甄

字陶村。樂陵人。敬齋公弟。乾隆癸卯優貢。官萊蕪訓導。著陶村詩草。

送友歸膠西

同披石鼓接槐陰。

時同肄業太學

三載論交愜素心。猶憶聯牀風雨夕。

青燈一穗夜沈沈。

驪歌忽唱小陽天。遙指南雲拂玉鞭。望斷大珠山下路。蕭蕭黃葉馬蹏前。

王所擢

字選堂。號小山。樂陵人。陶村公弟。乾隆丁酉拔貢。官廣昌知縣。著羅峯詩草。

過重陽半月菊始開。招飲因賦。

階前手植傲霜枝。喜見金英裛露時。人是去年同會健。花憐今歲獨開遲。樽中有酒酬佳節。客裏逢秋動遠思。尙盼滿城風雨。

至不催租賦只催詩

題懷潔上人詩後

辭句毫無蔬筍氣懷清仍是本家風名僧高格自千古不在參

禪入定中

李寶裔

字佩三號監榆惠民人前鈔文襄公元孫官安徽州同

著亦廬文集蟪螟巢詩集

郡志文苑傳寶裔幼有神童之號河間紀文達公見其詩

文目為當代偉人尤精書法京師人得其尺牘視如拱璧○崔曉林旭念堂詩話監榆耽詩善書著有亦廬閒話聊齋傳奇九種蒲州關廟二碑其遺筆也○公詩惜未多見

雜詠鈔一

滿庭秋色比春多奈爾寒香冷豔何曉起窗前問花事西風開到翦秋羅

范穀貽

字蓼匪號君有霑化人乾隆甲午舉人官長垣知縣以

子承遜

贈薊州知州

郡志循良傳穀貽初宰定興地當孔道皇華使臣絡繹不絕以

禮接之民得不擾丙辰補滿城地衝更甚貴人使有以小忤毆縣民者執而扑之貴人怒大府命往謝遂殺然日無過何謝獨有官可棄耳時索倫兵過境入民舍奪模餌家奴叱之為所毆穀貽白其將立拘其兵貫耳于市前途肅然乙未調長垣長之地丁歷為銀匠把持于是除其弊令民得自完納有與人同行而匿其金者鞠

武定詩續錄
十
之不承乃命役給其妻曰汝夫已供贓所矣可速將來不然將執汝其妻懼出金付之以示其人始無詞有婦控其夫為盜所殺者訊之姦也問所私婦支吾忽揚目指一人命役曰執彼至則詞服眾異之曰吾見此人于供姦之後即排眾出徐步而去彼實與謀特來此探伺及聞供驚去恐跡涉倉皇故示閒暇也眾稱為神明

乙卯仲春感遇詩 鈔三

鬢髮短髮換絲條。蟻夢槐柯意未消。杯酒煩聽燕市筑。星軺待看海門潮。春雲膚寸窗前展。嶽石崿從筆底搖。聞說繞朝能贈策。長安西望雨蕭蕭。

滿百難期正半過。服官術短愧鄉科。形非衛玠千夫看。治負張堪萬戶歌。腹裏曬書笥已罄。酒家折券債還多。僮奴莫測情如

許怪爾忘餐口自哦。

索居奚事問穹蒼。義命恬安只自量。岱側惟應驚猛虎。斗樞猶恐號貪狼。典衣徒立相如壁。倒篋無餘陸賈裝。幸有斯民三代直。去思今日口碑香。

李友驥

字余吾。惠民人。味初公弟。乾隆丁酉拔貢。官兗州教授。

截取知縣著記里河上秋聲等集梓蔭山房詩。

郡志孝友傳友

驥與仲兄蕃升相友愛。弱冠膺選拔入京。朝考後聞仲

叔莊浪司馬甘肅賑案被議急奔涼州。四馬單僕夜行。遇虎弗懼。隨時吟詠。自娛。有記里等記藏於家。

寄念圃雲升

滿城濃綠麥迎秋。捧檄南來當壯游。文字寒疆緣共結。池塘春草夢還留。卅年舊雨非新雨。匝月同舟是故舟。花甲已週餘興在。相邀且上嶽雲樓。

以繭緝寄兒輩並系以詩

差伴緼袍扶酒態。聊同短褐擁詩狂。幸無統絳驕人處。勸爾烏衣子弟行。

黃維壑

字次颺。利津人。乾隆乙酉舉人。官金鄉教諭。

秋夜讀書

蕭齋澄爽道心生。卅載光陰付短檠。滿地霜華仙鶴睡。桂花風送讀書聲。

劉遇春

字淑來。利津人。百川公從姪。嘉慶戊午舉人。官曲阜訓導。

水鏡亭

地僻塵囂隔。孤亭枕碧流。方塘澄鑑啟。遠岫畫屏幽。魚戲蘋花浦。鷗盟杜若洲。月明垂釣處。恍憶洞庭秋。

張淑瑗

字翼遠號愚圃青城人嘉慶戊午舉人官棗強知縣

井陘關

地利資山險何殊蜀道難路從雲外轉天入井中看
阨隘功收趙乘奇將憶韓時清爭戰息立馬幾盤桓

吳澧

字東注號芑園霑化人南川公從弟嘉慶戊午舉人官

高安知縣著雪泥草

題袁春腴明府暝坐圖

陽盛成蒸歔陰凝作凜冽元化本太虛無心真奇絕
人生百年中光陰只一瞥胡為淒淒涼又復翕翕熱
涼熱無已時畢竟為誰設觀君壁上圖旁有梧竹列
座中暝坐人顏與君無別詢君為卻暑對此良高潔
暑豈暝可卻誰識暝之訣君暝我亦夢識破無凝結

示弟潯

卿相猶吾致富厚亦吾殖惟有膝下歡人生至此極
雖有千萬金難買時一刻愛惜欣有托鞭笞更難得

望大孤小孤二山

大孤之山平以衍。小孤之山削而起。二山屹立無傍倚。衝破彭蠡大江水。水離復合合復離。一起再起九十里。吾聞海上三山勢迢迢。駕出渤溟看六鰲。此山突兀浮江面。孰實使之堅且牢。二山遙望在眼前。孤而不孤如比肩。海山可稱神。此山亦可仙。呼孤爲姑任人傳。踏定脚根石不轉。送盡往來名利船。

華山頂掛雪

峩峩插天碧芙蓉。霎時烟靄霏重重。終南太白列孫子。不亞齊魯丈人峯。山上掛雪山下雨。華陰道上噴石乳。琪花玉樹雪中開。何待人間催羯鼓。翠崖丹壁兩晶瑩。六花應向石盆生。玉女

來游留素影。鸞鶴一聲天地清。人道華嶽天與齊。帝座不待通雲梯。天清日朗猶可見。十丈紅蓮開面面。而今天光亦如雪。山容頓老一色潔。我來瞻眺真奇絕。仰山不見山之巔。白雲無聲空回旋。惟見高高在上之青天。

游清華山寺

郭外清華寺。門從曲徑開。竹籬閒院落。鐙火遠樓臺。花氣因風入。江聲帶雨來。老僧方入定。暝坐莫疑猜。

孟津道上

烟水總茫茫。孤城接大荒。河聲喧古渡。人影立斜陽。一騎三春

路。千年百戰場。更聞風浪急。客意正徬徨。

九日偕友人泛舟渝川。登獅子巖寺樓。

天際離襟雁影殘。秋逢客裏倍闌珊。烟雲迷磴游蹤滑。風雨滿城昨夜寒。幾處懷人空社酒。十年故我老江干。山光水色渾無際。圖畫收來好共看。

游瀟州萬固寺

數里青山百尺樓。天然古刹占清幽。三千里外成孤客。二十年來第一游。風響松濤驚北牖。日迴塔影跨西州。雲生謾認桃源路。滿澗花香帶水流。

戊寅自新喻返權豫章。過萬松菴。弔亡妾程氏墓。

菴在邑之東郭。松竹掩映。久稱勝地。後爲敗僧所廢。予另擇僧主持之。贖田補樹。殿宇復新。僧乞記。泐石以垂久遠。兼禁翦伐。殿後余植玉蘭花三株。記內與松竹并及之。妾墓在菴後之東北隅。

荒涼古刹卽天涯。日落寒松噪暮鴉。此後離情江上寄。題碑只記玉蘭花。

百八摩尼欲自持。僧心未解佛心知。慈雲香海無邊際。可許蓮花作侍兒。

浙西竹枝詞 鈔二

霏微雨過夕陽斜。兩岸桑陰菜子花。春到江城風物早。擔頭三月賣枇杷。

細細風來香入船。橋邊竹屋裊晴煙。甕頭初釀女兒酒。留帶郎家不賣錢。聞有是俗

蘇兆登

字晏林。號樸園。霑化人。前鈔劍浦公來孫。嘉慶己未進

士。由編修官至福建按察使。濱州太傅杜文端公蘇公墓誌。公已未雋南宮殿

試一甲第二人。授編修。庚申充雲南鄉試正考官。壬戌充會試同考官。甲子補御史。戊辰授南安知府。整飭吏

治釐析積贖。無留獄。先是仁宗命侍郎廣興至山東。鞠訟以墨論法。諭籍隸山東。曾任科道。未行。糾叅者皆降調。公以是去官。南安民泣送者。填路。庚午補戶部員外。充順天鄉試同考官。甲戌補軍機章京。踰歲轉郎中。特授永平知府。未閱月。擢淮揚道。自昔任是者。以河渠為專司。餘但隨文書轉行而已。公多所駁正。又數鞠京控之案。事事精詳。不遑假寐。道光辛巳。觸熱。勘河隄。積瘁得疾。陞福建按察使。適贈通議公訃至。公倉卒星奔。苦塊毀瘠。勉至終喪。而心瘁如故。遂乞告家居。奉母以終。

雨後閒步。聞兒孫輩讀書聲。率成十韻。

新雨潤庭除。午風時來去。我倦輒欲眠。後園自散步。春晚氣淑清。垂陰綠盈樹。書聲何朗朗。兒孫諷詠處。憶余方九齡。肄經檢疏注。爾時未知詩。劇喜毛詩句。彈指五十年。老馬曾識路。胡為

病侵尋日久竟成痼。耳目失其官。心思如豐蔀。扶杖三歎息。家學期汝付。

舟中苦熱

非才一官三月禡。半載奔馳如夢耳。一朝買舟江上來。江天五月炎如此。火織當空避奚從。涼飈在樹呼不起。欲眠逡巡暑生。筆方食蹉跎汗流。江湖萬里一身輕。窮通久惟天所使。丈夫生當耐寒燠。但悲歲月如波駛。嗚呼名業安可期。一尊待月醉江水。

秋夕閒坐有懷朱樸菴同年

斜月上簾鉤。蕭齋興自幽。吟難安五字。天易入三秋。露冷閒花院。風高古樹樓。能無嫌淡泊。欲共話新愁。

過六盤山十二韻

侵曉涼如水。隴山過六盤。縈迴三十里。羅列幾千巒。伏虎危崖出。修蛇曲徑蟠。雪凝高嶺白。霞起亂峯丹。乍向谿關轉。翻從壁上觀。籃輿乘樹杪。梵宇倚雲端。羽客形何古。茶漚話未闌。憑軒俯幽邃。杖策陟巔峴。村渺晨烟迥。巖深午日寒。春風疑不度。蜀道覺無難。聲教窮邊洽。民夷絕塞安。愧余今叱馭。何以振文壇。

望都小滄浪亭

夕陽煙靄古城偏。陸舫悠然對小灣。亭匾曰陸舫紅綻新蕖纔出水。

青搖低柳未遮山。靈泉湧自岡巒外。名士來從濟潔間。邑令趙公璪泉

濟南人亭池皆其經營憶昔明湖開短榭。歷亭風爽月彎環。

秋初邀陳石士太史陳玉方汪芝亭兩秋曹小酌。石士出

所作步吳蘭雪舍人和張船山吳玉松兩前輩詩二首。

依韻答之。鈔一

新句真堪籠碧紗。開緘滿紙墨痕斜。諸君豪氣凌高嶽。惟我疏

懷對晚花。興寄紋枰慙坐隱。珍藏名蹟足傳家。石士家藏趙吳興真蹟清

涼暇日須行樂。人事無涯生有涯。

夏日閒吟

拋書斗覺睡魔侵。晨夕頻來院宇深。多病空思修靜夜。閒居無
計惜分陰。觀棋遣日愁都埽。把酒臨風樂可尋。短髮莖莖猶欲
白。放懷今古自長吟。

暮抵潘廠

夕烟低冪徑微通。山色蒼涼草木風。隔水問人何處宿。雲間指
點一燈紅。

清寒初夏擬深秋。地接邊城晚更幽。身世茫然都似夢。舉頭鄉

月尚如鉤。

謁韓侯祠

嶺上愁雲尚鬱盤。無雙國士一邱寒。當年冤憤誰能雪。班馬同為漢史官。

陰謀早欲封諸呂。拉朽摧枯絳灌儔。興漢唯君兼智勇。他年不死定安劉。

杜坊

字建屏號樗園。濱州人。赤文公子。嘉慶庚申。恩科舉人。官蓬萊教諭。以孫翰。贈侍郎。著白雪山房詩。

萊州阻雪。用東坡除夜大雪留淮韻。

衝寒早登車。車後凍雪送。卻喜塵不飛。拳屈續清夢。曉來風勢惡。翻簸雪花弄。須臾隱溝渠。平掌險夷共。高擁石加凸。圓陷橋露空。纏紕綴滿衣。自詡瓊林鳳。前途見野村。冰帘倚檐棟。扶入呼暖醪。催療寒肢痛。主人索價昂。先白糶失種。從爾斗十千。為我開臘甕。

弔李文襄墓

楊柳何青青。春徧孤城樹。欹斜城上樓。逶迤城下路。越城東復東。近接文襄墓。英雄長已矣。功成人亦故。石馬寂無聲。松楸隱

正定詩經錄
雲霧憑弔復何言。萋萋涼風度。春陰自西來。城頭斜日暮。

中秋對月

客中情緒惡。良夜欲如何。秋月一輪滿。鄉心今夕多。枝高鴉睡穩。天迥雁聲過。惆悵不成寐。牆陰暗綠蘿。

十月十四日作

臥不深更起每遲。閒將身世默尋思。遣愁偏到添愁處。養病當於未病時。意興闌珊人事少。心情癩慢友生知。靜中餘有披吟趣。反復唐賢數卷詩。

夏日閒居

一徑莓苔罷送迎。科頭箕踞足閒情。綠陰滿地日當午。時有幽禽三兩聲。

題青厓春山竹屋圖

淡抹春山點黛微。環山春水葦芽肥。竹亭應是幽棲處。竹裏幽人歸未歸。

村圩

字莪園。號石渠。濱州人。美臣公孫。乾隆己酉。恩科舉人。

冬日早行

侵曉動征鐸。行行星已稀。白痕分宿霧。紅影透朝暉。歲晏村烟晚。天寒酒力微。那堪風獵獵。更逼旅人衣。

杜 瑄

字次屏。濱州人。赤文公子。增監生。以弟瑒官內閣學士。

封如其官。

昭君詞

金釵承命出邊陲。青冢常留萬古悲。淪落天涯同一律。行人羞讀李陵碑。

武定詩續鈔卷十

利津李佐賢竹朋編輯

杜 瑒

字次厓。號石樵。濱州人。赤文公子。嘉慶辛酉進士。由編

修官至禮部左侍郎。致仕後晉秩太傅。禮部尚書。贈

大學士。謚文端。著遂初草廬集。讀鑑餘論。治安本論。武

鏡古學彙纂。石南隨筆。夢餘因話錄。十硯齋雜志。時文

舉隅。時文辨體。郡志名臣傳。乾隆庚戌。聖駕東巡。瑒

進士。由詞林官至吏部侍郎。迭掌文衡。生平持躬清正。辦事勤慎。公餘課子。孫極嚴。子受田。由詞林官至大學

士孫翰翮前由詞林擢至侍郎一門盛事曠典親瞻近
代罕有自七十三歲引疾後著作尤富兒孫召見時
上不時顧問重赴鹿鳴筵宴賞加太子太保咸豐
元年晉加太傅禮部尚書壽九十五歲卒國史有傳
○公自訂年譜自嘉慶壬戌至庚辰歷官左右贊善侍
講侍讀侍講學士侍讀學士詹事內閣學士充成辰
順天鄉試同考官放順天學政自道光辛巳擢兵部右
侍郎放浙江學政壬午調吏部右侍郎丙申引疾致仕嘗
乙未充經筵講官調禮部左侍郎丙申引疾致仕嘗
自作贊云此何人斯不帶於上不根於下其羸則嗣宗
其懶則叔夜其樂田畝似陶其愛山林似謝人且鳴
我則蝶化古之人古之人吾烏知其誰之亞耶癸丑九
十歲生辰恩綸特沛邀御筆匾聯書畫紅絨結頂
黃面貂褂及珍寶文綺之賜時以天恩高厚非意
所及兢兢懼弗克勝又曰君恩至大而無以報也親
恩至切而不可忘也祇此欲報不忘之懷永抱此以終
古焉已矣觀此可以知公之志矣公歿後晉贈大學
士親臨奠醊入祀賢良祠予謚文端賜祭葬邀

恩旨凡四皆曠代異數也

恭和 御製四面雲山樓望遠卽景元韻

層樓鬱嶢嶢緣陟凌絕頂前揖峭削峯背卻欹崎嶺滃勃雲氣
漫葱蒨山容逞四面看雲山振裘若挈領天步時俯臨曠如
闢靈境近接招提居塵埃那待屏鏡瑩照不疲珠圓動靡梗彈
指曼陀花一洗山雲影

感遇

貧賤不自立富貴何所圖古人處憂患不以易歡娛末俗何草
草錐刀乃競趨安知壯士懷各有徑寸珠光華常自照肯爲塵

武定詩集
二
埃汗以茲。歷苦辛。適願皆坦途。相彼夸毗子。爲樂不斯須。
小夫喜訾毀。修士甯自全。衆口之所集。好肉剗成癩。況乃投以
隙。聽者誰不然。所以古君子。不處嫌疑間。良友諒且直。翼之生
羽翰。淫朋一不戒。忽變青與丹。吾黨少年人。毋乃罹茲患。忠厚
日以遠。念之推心肝。

登清風臺

命駕出盧龍。挈舟弔孤竹。宛宛首陽山。灤江緣其足。山夷江無
波。清飈振林木。偃僂謁古聖。心神爲之肅。高臺何崔巍。複道離
宮屬。今年萬乘來。鳴鑾響空谷。緣知前聖心。更邀今聖燭。

侯國乃故里。零雨豐年卜。定可惠遺黎。豈但激頽俗。扶持一登
陟。日旰前旌促。行行且默祈。出門萬山綠。

薄暮雪作繫舟山村。命酌獨舉。欣然成什。

朝發富春山。暮指錢塘碣。北風吹凍雨。灑爲半江雪。我行旣遄
迴。輾轉依林樾。頗似東山詩。滔滔感時節。茅檐遞高下。檣籬備
曲折。緬彼廬中人。良爲年豐悅。故人贈佳醞。開甕出芳冽。霜爪
擘黃橘。肺腑俱清絕。取醉聊自持。坐久漏云歇。開窗更縱觀。玉
虬舞飄瞥。烟波殊瀕洞。天地真寥泬。安得撫長笛。一吹山竹裂。

塞上勸耕詞

鳴鳩鳴過春山背。耕人耕過長河尾。犂犂确确十頃田。前村後村鞭犢起。卻說去年雪一尺。覆地蝗種沒。要卜今年雨三寸。入土麥根活。勸農使者東方來。車騎數里生塵埃。手持勞酒勸爾飲。努力官家租賦催。不見扶蘇城下路。至今猶有秦時灰。

尚書履

門如市心如水。臣不逢君那有此。心如水門如市。君不知臣復何恃。臣罪當誅。臣言不誣。君欲復聞尚書履聲亦更無。

劉平妻

胡氏從夫戍。夫爲虎擒。氏殺虎奪夫。見楊鐵崖樂府按。

劉平濱人也。其村今猶稱殺虎劉云。

棗陽道上車粼粼。道旁猛虎飢齧人。健婦夜中隨虎去。虎口奪夫虎亦怖。拊背扼其吭。搏擊空拳張。顧呼車下兒。拔刀屠虎腸。谷中悲風瘖不發。仰視列星爲低昂。且烹虎肉作朝食。卻裏夫創問夫疾。使兒無父妾無夫。妾欲有生安歸乎。

楊吉村儀部見示繭園畫幅類登萊間山水

海風吹我長安住。夢魂不識東山路。拌教五岳十年游。攬袂欲行嗟已暮。故人示我雲山圖。認是鄉關瀟酒處。何由揮手謝塵羈。攜家卻向圖中去。

題李滋園觀察江天縱目圖 并序

滋園於嘉慶三年過京口登金山命工作圖於江濤浩
 渺之間遙情勝概映發眉宇今甲戌將復出需次京畿
 作詩紀事不勝今昔之感并屬同人題句四周余適病
 起於牀第間操管輒興奮飛之思故於末語聊寄意云
 李侯手持縱目圖挂我南軒之東壁自云作此十七載而今盛
 顏不如昔余謂君今方壯耳捲懷何止濤千尺遠游似得江山
 助答報 聖朝在一出如余作宦來上都磨牛團團踏陳跡東
 南寸步何緣到耳有金焦目未識祝君持節下淮浦賀循儻為

季鷹客扣舷一作水龍吟也應驚破吳天碧

關溝行

前車後車不相續仰者僨轅俯脫輻前馬後馬不相屬上者踣
 膝下踠足鈍或磊磊銳簇簇萬轉千迴往而復百步不得一步
 熟一瞬而眩乃顛覆噫嘻危乎艱哉我思遠古之世茫茫昧昧
 何所胚胎天柱折兮地軸摧但聞搖岡岌陵之衝颺崩崖轉壑
 之犇雷虎豹懼伏龍蛇遠然後岢峿兀砉然而中開怪石何
 巉巖連峯合沓縈烟嵐白日行天忽西匿纍纍星斗出其間重
 巒直北三百里乃見單于牧馬白草黃沙田問君從此去何時

復來還。昔日黑頭今華顛。無爲久此凋朱顏。嗚呼無爲久此凋朱顏。

盧龍雨後觀山水放歌

水氣不在水。山光不在山。譬如詩人愛山水。詩成擱筆心依然。後世讀詩兼愛人。彷彿水之烟。態山之嵐。搖溶牽曳無定在。千里捲入胸懷間。我欲放眼浩渺之江上。又欲振衣縹緲之峯顛。橫風遮空不能到。吹夢乃落盧龍邊。盧龍有山亦有水。春雨灑戶驚晝眠。竭來後園一騁望。但見長瀾疊嶂沐浴爭娟妍。裊裊行雲寫不得。執管欲下心慙焉。嗚呼造化之工乃如是。詩人之

筆誰爲傳。世不有坡公與米老。空令佳句飄泊隨風烟。

八寶山

八寶山前春水平。短輿迤邐田間行。稻秧未出蘆芽短。日午閣閣聞蛙鳴。居人不識居山樂。詩情百種終無著。春風一段小江南。馬策前頭歛飛落。

早至響水鋪

大風刷沙石激水。疾走桑乾三十里。沈沈白日上東峯。山村人家臥不起。村前雷轂響奔濤。山下風吹萬木號。暮春三月尙如此。何況霜天縮蝟毛。塞冰積雪陰山路。多少寒鴻飛不度。君看

秦漢戍邊人。弓刀悄背臨洮去。

度懷來沙磧至岔道

空桐上與北斗直。鴻濛氣湧萬峯出。長河落地走東海。下見水平四千尺。蚩尤所都禹不到。界疆要自洪荒闢。文字未與中原通。唯見東西轉白日。來牛去馬那計年。蹋碎媧皇補天石。南風四月吹黃沙。誰歎久行去其家。前行過去後行續。連車似引常山蛇。乍可光輝照行路。吹角邊城烟景暮。沈沈虎豹立九關。絕巘當空君且住。

諸公見和新晴上灘二詩賦此答謝

蓬窗得飽日無事。忙心肯向閒中置。獨穿廢井汲寒泉。素綆銀餅聊一試。風吹空穴偶成響。但逢過耳還應棄。賞音無復笑皇芬。一飯未終章屢至。奇懷陡入龍蛇腕。妙句頓含冰雪思。相看矛戟總森然。欲歛橐韃三舍避。公等落落青雲人。弄筆亦似魚龍戲。卽今破浪乘長風。定知一出羣空冀。我衰不堪稱下走。猶能洗耳聽鸞吹。會須挽過上灘舟。瀛島蓬山邀把臂。

聞鳩

竹樹壓牆牆欲傾。屋角時有春鳩鳴。破曉不辭千百喚。催晚猶聞三兩聲。百鳥何樂鳩何苦。雨則呼晴晴叫雨。雨晴豈爲一身

謀似與耕夫相共語。君不見子規嘯。只怕蓬飄歸路迷。又不見
鷓鴣鳥。空使行人增懊惱。世間萬物各有託。我獨何爲天一角。
有錢但買東山田。歲歲春鳩尋舊約。

觀石門瀑布

并序

幼讀先大參公詩。夢想其境。今行過之。泊舟石闕下。沿
流而入峭壁四圍。一水回折。飛布千尺。挂巖直下。隨風
飛洒。若烟若雲。侵衣濺面。肌骨皆清。意謂非人世也。歸
而紀之以詩。

疾雷擘玉峽。白龍飛上天。至今但留所行路。噴爲萬斛頗犁泉。

削壁直上一千尺。隆隆陣鼓殷其顛。凹凸激宕成飄洒。拋珠濺
沫如風烟。書生仰面詫奇絕。忽覺衣袂凌躡躑。雲陰日暮不歸
去。癡想欲問皇古前。無乃倒吸滄海入。亦恐上鑿銀河穿。四圍
蒼翠皆岬嶸。一權宛轉相沿緣。天生此泉在此境。神工鬼斧誰
雕鐫。興來舉杯一引滿。出門自謂臨江仙。扁舟夢醒不知處。赤
壁之游空惘然。

甌江曲

江波滾滾去如箭。下灘正急上灘慢。江樹十月紅如花。西邊翠
竹東白沙。山脚斷崖山背路。人家半在山腰住。一峯落葉一峯

雲日日開門闕朝暮。朝朝暮暮往來舟。前日少年今白頭。白頭人去少年在。山自青青江自流。

甲申生日示兒受田

兒子清辰拜中霽。古瓶插梅為予壽。挂壁仙人何自來。插梅於瓶畫仙於壁節羽衣似向丹山迴。花裏有人人隔花。斯人修到由餐霞。其時事我無仙骨豈勝此。歲月真如赴壑蛇。去年曾踏天台路。今年又喚甌江渡。石門題壁兩三番。爪跡回頭已成故。少時世外閱風烟。老更崎嶇越海邊。何從卻買種花地。底處能逢花裏仙。為爾且盡杯中酒。神仙於我復何有。醉來儻可號梅顛。花底婆娑看

參斗

自岔道至土木驛

太古山川異。經綸草昧存。日寒春失色。沙迴地無垠。白草迷人逕。紅樓識堡門。前朝遺戍壘。恐有未招魂。

遷安道中

春樹繞春烟。桑田間麥田。山舍人影小。沙印馬蹏圓。落日明孤戍。繁花暗遠天。定知今夜宿。身寄畫圖邊。

土木謁顯忠祠詠古

豎子安知戰。鑿輿底太輕。隻輪曾不返。大厦忽成傾。碧血已塵

土。青山猶哭聲。同心如少保。遺恨莽難平。六句用少陵亦適與事會

良臣衛社稷。軍出夜倉皇。無力迴天步。甘心作國殤。先朝所培

植。一旦付淪亡。大漠歸來日。曾無弔戰場。

參肉其足食。還聞肖像祠。將毋南內夜。不念北庭時。易世終難

寤。孤忠孰與期。乾坤能再造。幸也亦何辭。

成敗皆同沒。蒼茫舊跡沈。風雲猶變色。天地復何心。山勢回關

右。河流傍隴陰。悲歌戎馬後。短髮落遺簪。

為閩雨帆中翰作山水小景綴之以詩

忽發林泉興。歸山恐未能。閒將三寸竹。聊代一枝籐。何日攀雲

去。當年踏石曾。虛堂幽夢返。殘夜雨如繩。

晚望

殘陽方墮地。四望曖蒼烟。列戍高原上。連檣淺渚邊。人聲臨夕

靜。星影落波圓。屢問停舟處。燈花耿欲然。

觀石梁瀑布

絕境何人闢。幽尋路不分。橫飛千尺雪。穿破幾峯雲。拂石看奇
字。聽僧說舊聞。坐來忘歲月。花落雨紛紛。

江心寺

高宗自棄其人與土。而東入海。二王亦襲其跡。雖文山

無益也

寂寞江心寺。英靈尙在無。興亡千載事。忠義幾人俱。突兀田橫島。飄零趙氏孤。吳山重回首。遺恨失雄圖。

送計籌山先生歸松陵

愁將詩酒寄微官。歲暮逢人道路難。千里鱸蓴情鬱勃。十年簪紱意闌珊。山村過馬烟容瘦。江步停舟雨氣寒。回首可憐門下士。朝朝山斗向南看。

五日送兄東屏歸里

少長提攜亦有緣。他鄉節物轉淒然。兒時舊事都成夢。病後餘

生欲學仙。馬氏功名歸下澤。陶家風日愛斜川。惟應早下西軒榻。白晝看雲蹋足眠。

硯陽山房題壁

山外青山樓外樓。前人句邊城風景似中州。千重綠樹連雲暗。幾折明河入塞流。柳陌雨晴長帶潤。麥田烟暖欲成秋。年豐野老無餘事。日枕西窗作臥游。

有感

手研丹墨自程書。跋燭常過二寸餘。筆札祇供貧俯仰。歲年幾與病乘除。滹沱夜雪催征騎。上塞春風走傳車。何日勞人知席

暖青山憐我我慙渠

春晚

老盡鶯花南北枝。自憐疏懶下階遲。蕉如再噉成何味。繭已重
緘尙有絲。應客怕逢中酒後。懷人愁見上燈時。唾壺如意當年
恨。只算潘郎綠鬢知。

恭和 御製山亭晚眺元韻

曲曲屏風疊疊山。山亭孤敞寫螺鬟。梯雲欲出千尋上。郢野全
來四照間。鳳尾張琴松匝匝。虎牙瀉玉水潺潺。遙聞塔院鈴聲
落。佛界惟應 聖界攀。

灤平行館疊題壁韻仍用前人句起

山外青山樓外樓。行人說是古興州。天撐鰲極三韓盡。水帶龍
庭萬壑流。此日林巒皆近 御。行宮在縣西當年關塞鎮防秋。欣看
一體無遐邇。擁節書生紀壯遊。

還過九松山疊前韻

旋生後跡滅前蹤。未覺今顏異昔容。匝月再來蕭爽地。周天都
插妙高峯。偶停倦轡因思茗。小倚疏寮爲看松。身到上方應更
好。幾時一試撥雲筇。

偶憶去歲在灤陽得句因續成之

迴巒複嶂敞烟扉。兩載重經對翠微。草色不離官閣綠。楊花偏繞御園飛。占雲較量朝朝雨。數日安排緩緩歸。一別丹邱好林壑。青春閒煞謝元暉。

詠春詩 鈔四

春陰

江樹垂垂江草齊。青山遠近水東西。凝烟更失樓臺影。漏日先明桃李谿。鷓鴣無聲林外覺。蘼蕪有路夢中迷。晚來欲雨朝寒甚。愁聽閒窗夜半雞。

春晴

不風不雨恰經旬。說著春游百種新。鬪草占他調馬地。吹簫喚起倚樓人。三時鳥轉爭千樹。一院花光豔四鄰。只索大隄遮望眼。山長水遠總傷神。

春晝

攀得仙桃種佛桑。一春清課爲誰忙。秋千院落時相見。亞字闌干影正長。蝴蝶儘依花側畔。栗留不斷翠中央。紗窗睡起惺忪甚。付道分明又渺茫。

春夜

拾翠尋芳興欲慵。沈沈蕭寺幾聲鐘。伊鴉慣怯銀屏響。掩藹微

武定寺賣沙

卷十

七

欣寶篆濃聽雨樓頭燈焰。護花廊外月溶溶。黃雞無賴頻催曙。眼底關山一萬重。

九河

禹迹芒芒問九河。九河古道在德州河間棣州之地。與禹貢大陸北播為九河之文合。海濱碣石未銷磨。自天津南盡棣州數百里內惟海豐舊河岸有馬谷山趾頂皆石周圍二里許形如碣石蓋即同為逆河處與禹貢夾右碣石之文合。漢家分土名猶在。河間以九石之文合。宋氏傳經說竟訛。地金南宋人不履其跡故蔡傳多耳聞臆說也。自昔洪流歸渤海。棣州古渤海地河所歸。豈容別派混滹沱。北則天津滹沱入海處九河在島夷尙識來時路。其南明矣豈得越入平州乎。萬丈潮頭奈爾何。蔡傳指驪城之碣石山為碣石遂深信淪入於海之說以銷九河之案可謂疏矣。

永康山行

叢林鬱鬱草萋萋。復水重山望欲迷。石路千盤經雨滑。沙田幾疊帶雲低。農家風景人如畫。春晚光陰鳥亂啼。幽賞不知程遠近。夕陽猶在衆峯西。

伊太守山亭夜宴

五馬平臨最上頭。朱欄畫檻倚清秋。隔城燈火遙分座。赴海江聲迴入樓。人世幾回傷聚散。古來百歲等沈浮。千觴一舉休辭醉。門外斑駁不可留。

南行途中

長坂西臨駱馬湖。幾家村落遠烟孤。青驄蹀躞平林下。一幅春陰行旅圖。

青山一髮貼天痕。木落沙平河上村。更聽竹西歌吹去。江南春色最銷魂。

偶成

螢棲腐草緣階上。馬踏秋泥隔巷聽。正喜長安連夜雨。閉門三日寫黃庭。

關城

已拌春酒餞春華。春去長安客憶家。誰道漁陽春更晚。關門五日

月落楊花

大名使院水仙迎春盛開而余將行各系以詩

水仙

我來冰雪鎮淒淒。下九初三畫閣西。此後蜂狂蝴蝶亂。惜花詩嬾對花題。

迎春

的的金簷映酒罇。圍鑪一笑忽成溫。昨宵風雪關山路。枯木寒鴉正斷魂。

梅花

鳴琴館裏微風夜。輟權谿南小雪時。雲影離離天淡淡。一般清
味少人知。

過桐廬

富陽西去瀨東頭。宛轉春波抱郭流。烟雨中間花柳畔。家家有
箇望江樓。

吳純彥

字正修。號括園。霑化人。東注公從弟諸生。

感懷

炎炎夏日長。萬柳蔭書堂。撫此廬中樂。仰笑浮雲忙。浮雲逐太

虛東西無定翔。吾廬天地大。磅礴一粟藏。揮絃下元鶴。翳葉聽
沸塘。熱中非吾事。無慕此心涼。偃仰北窗下。高臥傲羲皇。

湖上騎驢行弔韓蘄王

錢塘江上怒潮飛。胥潮慘澹種潮悲。錢塘湖外碧血注。岳王冤
沒韓王去。韓王奮勇立奇功。報國直欲協精忠。誰教黑獄成三
字。終身謝絕兵革事。塞驢破帽游湖濱。回首蕭蕭戰馬羣。憶昔
大戰臨安道。士卒踴躍爭騰掉。而今浪跡賸一身。澤畔聊復效
行吟。美人掠陣鼓聲絕。但聞流水聲嗚咽。且把風月換烟塵。春
山圍繞畫圖新。畫圖寫我漁樵扮。麟閣不識將軍面。路人爭說

故將軍將軍掩耳若不聞英雄到頭只如此宋家山川長已矣
但看一碧漾天光西風落日烟蒼茫

鵲華橋晚眺

半城烟水半城花蓮子湖頭日又斜一曲菱歌撥櫂去碧蘆洲
裏有人家

張渤

字匯川號雪園海豐人怡菴公從姪乾隆甲寅恩科

舉人海豐吳長節惺惺齋隨筆吾鄉張雪園先生天才
豪邁學有淵源以連赴春官不第放於酒歿後降
亂詩云不愛詩書不愛禪平生自號酒中仙青山踏徧
無人問懷抱孤雲倚石眠生前詩文不自收拾茲於友

人處見一散帙
摘錄以公同好

接舍弟魯源家書即寄示

旨哉坡公詩一言見至情豈獨為吾弟要是賢友生

二語係坡詩接

讀吾弟書愛敬不可名心苦語周詳使我意氣平所嗟歡會稀
南北各遐征我久缺定省君還如帝京天涯復海角相望春
暉明三冬夜悠悠愁緒繞寒更努力寡吾過聊以慰心旌

游子吟

慈母聞兒行如疑還如懼含淚不忍揮轉恐兒不豫出門告僕
夫暫將征車駐鳴臙勸兒食別我從此去匆匆向東南不忍重

正字言類金
七
回顧於陵與妹別。更入臨淄路。境界日以生。皆非素所遇。子然
棲孤館。風霜掩村樹。心折骨亦驚。恹恍矢所據。豈惟慈母心想
像不知處。

得小石作歌以抒懷

宋愚燕石以爲寶。人生愛憎難分曉。癡情易地同絕倒。拾得南
山石崎嶇。不爲礎不爲礎。竟將一角置庭陰。時有好雨池溢盆。
居然峭壁轟江濤。物色風塵貴知己。我今得爾心狂喜。爾不能
言我更頑。泥塗汙辱堪爲比。旅館蕭然春亦秋。紛紛花落不勝
愁。日暮憂來誰與語。浮雲流水同悠悠。浮雲流水同悠悠。長歌

一曲爾點頭

無題

騎馬河干阻去津。一般淪落混風塵。似曾相識疑前世。我見猶
憐定此人。北舍花開空照眼。西樓月落獨傷神。聊將小扇尋幽
會。記取枝頭紅杏新。
美人幸免沙吒利。義士猶望古押衙。鴻過樓頭空有信。燕來海
上本無家。淵雲墨妙歸春夢。燕趙悲歌付落花。獨有朱顏愁鏡
裏。相逢莫使惜年華。

悼懷從兄鏡浦四律并序 鈔一

歲在癸亥。余客錢塘。先鏡浦兄自粵東病歸。卒於賴。距
今已三載矣。痛鴿原之寂寞。傷雁羽之凋零。歷溯生平。
輒通寢寐。況弟與兄。理鬱百端。流離一致。睇門閭亦遠
矣。顧身世而蕭然。閱歷星霜。均無緣於骨肉。渺茫天壤。
復何間於幽明。序齒僅長予四歲。關心應惟我兩人矣。
獨念蓋棺著定論。在君猶有令名。集木矢小心。嗟我曾
無善地。北燕南越。西楚東吳。何處尋君。依然故我。苦燕
食鶉衣之非計。既備悉世味之艱。信蠅頭蝸角之難求。
卒莫解天心之吝。藉云玉女於成。畢竟空言何補。已矣。

西江月冷。游子安歸。東浙潮生。愁心共湧。今茲棲身一
榻。空愴懷昔日池塘。他年握手九原。應不殊舊時風雨。
爰成四律。用志幽懷。

渺渺元廬後會難。低徊往事憶長安。晴窗試筆春風暖。蕭寺挑
鐙午夜寒。伏枕勞君憐繼晷。余每鐙下作文。兄輒臥而不寐。傾囊偕我共加餐。
遣懷還擬吟觴集。酒盡歌終興未闌。

感懷

羊腸鳥道緒無端。海角天涯思渺漫。蹤跡飄搖憐燕壘。功名遲
滯笑魚竿。全拋家事藏身拙。勘破人情涉世難。博得微官成話

柄何年苜蓿長闌干

花神寺前看荷

遙山隱約夕陽斜。淨植亭亭映晚霞。卻愛綠雲將盡處。風漪蕩漾雨三花。

友人下第後仍理舊業啟笥而傷心焉贈以絕句

嚴冬十指耐風寒。鍼綫頻頻到夜闌。製就嫁衣仍未嫁。開箱今日忍重看。

吳熙曾

字緝文號穆齋海豐人健輿公元孫嘉慶辛酉進士官

編修著少頤詩稿

濱州杜文端公墓誌。余與君同舉進士。君散館一等授編修。先後充得士極一時之選。君天性過人居喪哀毀骨立。事兄敬愛如孩提。少儻多所不屑。通籍後益謙謹。為詩文刻至切深。歸於自然。不喜聲氣。曰吾方蘄自信。不暇安用標榜為哉。在史局致力綦勤。寒暑未嘗稍忘。甚勞勤。以至於病。他人憂之不恤也。

秋夜作

涼風下高梧。蕭然秋意警。起視微雨過。烟空澹無影。夜靜聞竹聲。滴瀝露華冷。中有素心人。獨坐發深省。

送張魯源之温州二首

鈔一

聞道東甌郡。江山勝跡饒。危樓吞漲海。孤嶼蕩迴潮。謝客留題

武定詩賈少

卷十

武定詩續金
舊仙梯入望遙。知君游屐在興與白雲超。

和劉崧嵐明府西禪寺聽鐵舟上人彈琴

悄悄僧院寂。逸韻出琴徽。流水澹無際。涼雲空自依。清隨天籟遠。靜識古音稀。餘響歸何處。微風滿客衣。

八月十六日出闈後偕諸同人名士軒讌集卽席率成二

律鈔一

珠簾畫舫記歡場。自笑當時我太狂。虎阜笙簫春對酒。鴛湖花月夜傳觴。驚心駒隙如彈指。迴首鴻泥總斷腸。攜瑟祇今來稷下。可能入破譜霓裳。

卽事

傷春傷別總難支。我是三生杜牧之。燕子不來人又去。可憐恰值落花時。

代臯羽叔賀王介夫姑丈納姬四首 鈔二

西子湖光眼底經。歸來清夢繞南屏。遠山樣好君休妬。別有人間黛色青。

油壁車遲輦繡輪。爭傳桃葉渡江春。從知子敬添新課。更畫烏絲寫洛神。

悼亡

武定詩續金

卷十

三

又見曇花菱一枝。電光石火不移時。那堪多病閒潘岳。三賦虛
幃墜月詩。

難將身世證前因。七月匆匆跡已陳。漫說華年流似水。可憐塵
夢短於春。

愛聽秋墳鬼唱詩。自拈斑管寫題詞。早知好句終成懣。腸斷箏
鐙共讀時。安人喜讀聊齋有閒窗風冷孤
鐙死好聽秋墳鬼唱詩之句

碎翦蠻箋墨自塗。記攜嬌女辨之無。而今冷落妝臺筆。誰補紅
閨夜課圖。

愁腸如水翦難分。往事真成過眼雲。已是鰥魚眠未穩。曉鐘斷

續不堪聞。

吳觀孚

字竹泉。霑化人。東注公從姪。布衣。公性超逸。不事帖括。業議論多持己見。不肯為人所屈。故落落寡合。而取予不苟。尤好游足跡。半天下。所見一發之於詩。識者不敢以布衣忽之。殆謝茂秦之流亞歟。

旅次

風搖星欲動。人坐夜漫漫。月黑灘聲壯。鐙青劍影寒。愁深惟對
酒。客久愧彈冠。寂寞霜天晚。空歌行路難。

次烏衣鎮

武定詩賈少

卷十

七

寒烟凝野渡。風緊雁行秋。斜月天邊樹。殘鐙水上樓。迷離鄉夢短。蒼翠遠山稠。濁酒難成醉。聊為散客愁。

采石夜泊

采石磯頭雨乍晴。客舟維處夜寒輕。疏鐘野寺潮初上。橫笛江天月正明。山影迷離鄉思遠。橈歌欸乃旅魂驚。酒闌欲作懷人夢。獨對青鐙夢不成。

武昌懷古

憑臨三楚此名樓。襟帶江山據上游。兵散貔貅餘故壘。賦成鸚鵡賸荒洲。開筵觴月人皆盡。釀酒臨風水自流。曾是雄藩名勝地。數行衰柳不勝秋。

武昌秋曉

漢陽門外夜維舟。崔灑題詩舊有樓。幾點青山吳苑小。一灣涼月楚天秋。鄉園有夢憑書寄。今古無情付水流。明日揚帆向何處。乘風破浪達江州。

蓬萊閣觀海

蓬萊高閣倚天開。萬里長風鼓浪來。北海拖藍浮島嶼。南山湧翠映樓臺。田橫養士終成義。徐福求仙竟不回。欲寫雲箋投海若。毫端愧乏大蘇才。

廣陵旅次

娟娟新月廣陵潮。淼淼長江客路遙。廿四橋邊春病酒。十三樓上夜聞簫。千山隔斷鄉心遠。七字吟成旅鬢凋。獨倚危欄花事晚。一天烟雨黯魂銷。

登樓

山川繡錯任徘徊。釀酒登樓懷抱開。時輩久無庾亮興。風塵誰是仲宣才。雲迷大野連天暗。雨挾飄風捲地來。莫向荆蠻重作賦。江關牢落使人哀。

玉鈎斜

錦纜龍舟迹已陳。東風無恙廣陵春。玉鈎斜畔青青草。埋沒隋宮舊美人。

姑蘇臺

姑蘇臺畔草萋萋。二月靈巖柳欲齊。重到夷光歌舞地。落花滿路鷓鴣嘯。

吳家桂

字一山。涪化人。竹泉公從弟。歲貢。

武定旅舍

徧地秋痕照物華。騷人又喜到田家。沿籬齊種蛾眉豆。供客還

烹解眼茶。四座賓朋新伴侶。一廬風雨舊生涯。卽今便可償詩債。莫待中秋贈桂花。

吳觀立

字一峯。號蓼坡。涪化人。素軒公子。嘉慶辛酉舉人。公家傳性

和易善屬文。教授生徒。所得館金與諸昆共之。生平拯極濟危。不可勝紀。

長歌行

十載萍踪成汗漫。塞上來游午過半。爭奇競險騁詞翰。猶有故人共傲岸。興酣歌些白石爛。漫漫長夜坐達旦。諧談雅謔精神悍。紅友亦任爵無算。尺幅貽來驚浩瀚。驪歌忽向臨歧按。舊雨

爭同黃金散。斗室一燈晃銀蒜。憶從前歲聯几案。焦尾不妨賞。自爨瘦骨嶮嶮挺竹幹。胸中差喜無冰炭。依劉我亦如王粲。似讀奇書在東觀。汪汪千頃迷岸畔。問字質疑爲主判。詞人謙退風流冠。大樹將軍蹟追漢。詩思穎銳光璀璨。一字之師重點竄。座中良友生嚴憚。有愧博雅羨淹貫。相忘星移與物換。秋風惻惻宵又盱。閒窗人起投筆歎。不如阿嬌傍酒幔。雁聲黃葉隨欵欵。離悰縷縷逐風亂。天涯到處無羈絆。何時相逢再把碗。齊烟九點斜陽斷。直欲舉頭天外看。

秋雨

疏雨洒空林。清秋響更沈。催還千里夢。滴碎五更心。敗絮寒風逼。孤燈夜氣深。閒樽殊寂寞。何處訪知音。

棲霞寺

蠟屐登高處。危峯接大荒。雲歸遼海白。沙擁薊門黃。暮靄迷蕭寺。秋風冷戰場。不堪重弔古。把酒酌斜陽。

冬夜與羽豐六弟閒話卽以誌別

又是三秋別。相逢說故鄉。低徊情未已。寂寞恨偏長。共笑謀生拙。同憐考業荒。離愁何鬱勃。心緒轉昂藏。燭燼衾如鐵。窗虛月似霜。誰家方弄笛。午夜喜聯牀。寫意傾醞醑。衝寒典驕驩。幾回

歌緩緩。千古憶茫茫。破夢迷銅漏。裁詩鬪錦囊。輸君中散懶。酌我次公狂。騰達酬期許。蹉跎愧老蒼。雕蟲真小技。作戲只逢場。

瑯琊卽事

雪泥鴻爪記年年。此地登臨亦偶然。兩岸波光雙屐雨。四圍山色一谿烟。依稀客夢迷胡蝶。多少鄉心托杜鵑。壯志莫教輸友輩。前程先著祖生鞭。

盧龍道中

盧龍絕塞古平州。烟草茫茫大漠秋。萬里沙塵迷海岸。一天風雪擁邊樓。山盤城勢迴環出。水咽河聲斷續流。莫指遺蹤誇射

武定詩集卷十
三
虎漢家李廣不封侯

癸酉秋日留別瑯槐諸同學

每臨秋水憶交情。遮莫匆匆唱渭城。三徑黃花人小立。半林紅葉雁留聲。低徊猶記來時路。骯髒何需去後名。正是倥傯戎馬際。閒窗愧作一書生。

秋日齋居

纔得幽居便覺閒。蕭條秋意滿柴關。吟懷未減詩成帙。壯志全消劍欲斑。熱不因人憐舊雨。貧仍故我愧家山。何堪更有他鄉夢。千點蓼花月一灣。

野店題壁

緣何作客善思家。驢背匆匆感物華。十里荒村驚吠犬。一叢老樹點寒鴉。登途此日憐蓬鬢。得句何時罩壁紗。旅館殘燈滅永夜。歸來猶是在天涯。

歲除

裘敝歸來逼歲除。天寒日暮渺愁予。風穿老屋三間透。雪壓頽園半壁虛。椎髻妻營鐙後爨。蓬頭兒廢篋中書。窮途只說家山好。未必家山合久居。

鑪灰畫徧總成空。楮拙頻添撥不紅。無可避來方是債。有方送

去未爲窮。全刪饋歲違年例。更少應門絕刺通。自揣吟詩慚飯
顆。家常處分但雙弓。

春日瑯槐卽事

梅花香裏事吟哦。到眼風光瞥眼過。埜寺寒烟明夕照。荒城春
水長清波。因留俠客衣頻典。爲買新書債更多。疏放不須勞問
訊。故人天末渺如何。

山海關

關門削劣控京華。一眺平原萬里賒。三衛旌旗開虎豹。九邊睥
睨走龍蛇。狼山夏日寒凝雪。蜃海秋濤暮捲霞。我欲相尋姜女

石。數行烟柳白雲遮。

驪城秋望

形勝由來控百蠻。羊腸千仞斷登攀。邊城霜落征鴻急。古戍秋
高戰馬閒。地擁荒沙連大漠。天開疊嶂作重關。夕陽衰草蒼茫
外。不見將軍射虎還。

齋居寄家兄臥廬

螢窗十載愧丹鉛。書卷尙留未了緣。爛漫儘教償酒債。疏狂真
少賣文錢。孤燈夜雨憐今日。古寺清陰憶往年。前路茫茫何處
是。恨難搔首問青天。

者番愁思渺無端。冷淡茶香興半闌。守樸惟嫌酬世拙。知非已覺讀書難。謝塘應入三生夢。姜被遙憐五夜寒。記否華箋傳妙句。天香吹下玉闌干。

己亥生日志感 鈔一

占得寬閒地數弓。絳帷披拂落花風。睡餘破悶三杯釀。靜裏逃禪半偈空。書到自嫌方是拙。詩因人索不求工。今宵更翦西窗燭。未許頽然號醉翁。

春日輞川卽事呈篋齋九兄

著得芒鞋任往還。橫斜仄徑趁橋彎。綠楊烟繞湖三面。紅杏花

藏屋半間。酒政漸從醒後懶。詩情惟覺睡餘閒。故人更有看山約。看到文峯始愛山。

劉炳彝

號午峯。濱州人。嘉慶辛酉舉人。

和吳蓼坡同年自壽詩 鈔一

擬向秋江覓釣磯。廿年回首素心違。那知燭武從今老。未許淵明有昨非。百歲中分駒更駛。長空不斷雁低飛。山雲也似儂飄泊。救旱功成各早歸。

張文臺

號齊垣利津人歲貢

翹社吟

漫擬河樓高會圖。相逢且共飲屠蘇。旗亭詩句誰多少。可有雙鬢解唱無。

東風吹絮結春綃。歸路匆忙過柳橋。欲折一枝慰離緒。隔河殘笛雨瀟瀟。

李鶴

字野田。霑化人。嘉慶甲子舉人。官濰縣教諭。公詩格蒼老兼有奇

氣生平所作甚多。今全稿已不可得。僅得五首。亦可窺豹一斑云。

夜雨吟

書生懸劍夜讀史。孤燈照壁烟色紫。戶外雲黑大雨來。電光閃閃神龍起。寒氣逼人森毛髮。急風吹破蕉窗紙。空中一聲霹靂飛。骷髏山崩魍魎死。

修禊

集禊帖字

此地無山水。幽情未可期。暢懷今日樂。寄慨昔人悲。暫與斯文會。年當既老時。晤言終不倦。契合得相知。

昔作蘭亭敘。今猶古所云。寄生隨大化。後死與斯文。俯仰時無倦。情懷日以欣。諸賢當有詠。此會樂同羣。

武定詩續鈔
列品殊羣類。風流此古賢。猶當終歲會。況是暮春天。迹與形能化。情隨遇以遷。亦云嘗至室。樂事敘同年。
崇文為盛會。咸集暢羣情。與契同悲樂。相知託死生。竹蘭春永茂。山水古長清。浪迹人間世。猶欣作老彭。

武定詩續鈔卷十一

利津李佐賢竹朋編輯

吳侍會

字泰孫。號竹泉。海豐人。健輿公元孫。嘉慶戊辰進士官

吏部主事。以子式敏

封安襄。鄭荆道。著竹泉詩鈔。公

遜甫公尊甫罷官後。就養都門。與當世賢士大夫遊。文
識無虛口。備極人生清福。詩筆清新流利。無飯顆牢愁
之態。雖天才超邁。亦境遇使然也。

感興

幽蘭生空谷。娟娟自靜好。風日媚暄和。春秋隨寒燠。一旦移盆

武定詩續鈔

卷十一

盜數莖已堪寶。雖然居綺疏。物情違溼燥。貴人厭滋培。棄置聽
枯槁。不如田間花。青葱兼茂草。

天街何所見。但見車喧闐。喧闐夫何爲。彼不知其然。有客啞然
笑。君胡見之偏。要知彼所營。如我守一編。動靜理如是。人各專
所專。

報恩寺古松歌

都門迤西梵刹多。先朝舊跡紛駢羅。報恩寺古倚城阿。長松千
尺鬱嵯峨。龍鱗皴染霜皮皴。勢加拏攫森矛戈。長夏濃陰潑黛
螺。涼風謾謾疑翻波。我來眺矚頻摩挲。盤桓其下影婆娑。老僧

留語一刹那。爲言此樹迥非佗。手植不知是誰何。傳聞千載無
改柯。文人過此輒吟哦。藉以流傳堪不磨。請君伸紙爲作歌。庶
幾神物同護呵。我聞此語笑顏瑳。爾何結習亦成疴。此松閱世
如擲梭。遼金元明彈指過。四朝興廢悲黍禾。荆棘幾見埋銅駝。
中間詩人手一搓。滔滔東下逝江河。傳與不傳問僧伽。誰其歎
賞誰詆訶。我法不殊汝釋迦。何如清淨蠲煩惱。猛勇精進功無
頗。好爲此樹驅詩魔。

太湖石硯頭瓶歌

我讀南宮研山記。龍池一勺涵沖融。壺中九華盛題詠。仇池亦

武定詩經金
復誇坡公惜哉祕玩不可見徒令夢想青芙蓉客來示我太湖
石恍疑古物重相逢巖巒瘦削擬二華洞壑窈窕如空同犀株
玉笏紛左右天然謝盡雕鑿工中有一峯更奇絕峩峩天柱虛
其中清泉滿貯常不竭寒冬但覺波溶溶文房位置宜視北膽
瓶不數高麗銅祇惜籬菊已彫謝霜枝點綴慳秋容安得驛使
遠梅寄繁花亂插迴春風不然採擇置靈草九節菖蒲青葱蘢
便當服食同石壽把袂高挹浮邱翁

舊畜兩羸以其一贈史衡堂乃數日而余羸忽斃戲為短
章索衡堂和

兩羸並畜艱牧芻一羸贈君君所愉君羸纔去我羸瘡自無而
有自有無塞翁得失生須臾誰其復譏轅下駒與朋友共其然
與大夫之富竟何如君休笑我舍而徒有馬借人今非亡無亡
通用
古有一韻雨
押者無害也我將戴笠看乘車

諸同年餞王可愚太守於龍樹寺之翰山樓適陶鳧薌觀
察以左遷來京卽邀入座

宣武坊南車馬喧輭紅十丈風霾掀衣冠時作濠濮想安得一
條塵襟煩月亭上人築精舍小樓虛敞依城根高槐卓午張繖
幄新蒲出水聽潺湲遂爲都人迎餞地朋簪時盍來鸞鶴淵明

摩詰胥我友。一方出守一謫官。同人醵飲斯樓上。行厨斫膾羅盤飧。或爲廋語資嗚噓。或談往事增悲歡。獨我鈍根無所語。時或欲笑時長歎。同年二百五十人。誰爲斥鷃誰鵬鷗。卽今落落餘數子。華顛半已頭顛髡。文章政事足千古。異時名字何人存。送人作郡春明門。年年到此酣離樽。諸公袞袞躋青雲。行看前後乘朱幡。我如鉅鹿諸侯軍。堅壁袖手如弗聞。又如東坡觀奕云。落子勝敗姑無論。但愁鞅掌多勞繁。此樓輸我常憑欄。

集沈飴原齋中值雪用聚星堂禁體韻

連窗嚴飈摧乾葉。一冬未見飄微雪。忽然六出花滿天。化工巧

戲真奇絕。開軒遠矚光欲搖。拂檻欹竹竿愁折。同人快賞坐縱橫。蠟淚成堆不教滅。紅鑪對擁體猶寒。翠袖頻呼肘偏掣。准擬青葱看麥隴。何妨醅酌霑衣纈。麗譙夜漏已沈沈。小閣重檐還屑屑。公等不見聚星堂。數百年來如電瞥。今昔遙遙妙景逢。佳話應使後人說。請君對此詠梅花。不信廣平心似鐵。謂史衡堂

張旭初移寓西河沿是夕雅集用田山薑移居韻

山薑昔驅薄笨車。載書萬卷秋移家。吾友移居逢臘日。羸羸凍負如山慶。東鄰歌館西郵傳。人聲嘈雜喧蜂衙。先生閉戶不聞見。一編高舉披橫斜。几席纔安先置酒。賓朋至至宜看花。況值

觴詠消寒夜。合添豔筆供塗鴉。奈何方鼓雲和瑟。有人忽作漁陽過。座有歌者衡。堂故作貶辭。吾儕豈可留缺陷。補天我欲呼女媧。

醉司命歌

司命有也無。誰其尸之終模糊。司命真也偽。古者祀之無廢墜。僉云臘月二十三。司命拜疏當上驂。享以飴司命甘。觴以酒司命醑。家家再拜送司命。人間是非休窮竟。有可使無無使有。從來顛預可為政。吾聞斯語頻咨嗟。生民數比恒河沙。縱使玉皇香案長萬丈。安能一一陳之賞功罰罪胥無差。得無司命徒饕餮。憑藉聲靈多忝竊。或云教化托神道。徒為愚夫愚婦設。既而

思之殊未然。大夫之祭竈為先。我亦豚蹄祝年年。不願高爵不乞金錢。五鯖不羅列八珍。不駢填。但願隨吾所有生炊烟。春韭秋菘互新鮮。美酒肥豕充喉咽。花晨佳賞月夕賓筵。大呼司命東厨前。陳牲醴三致虔。遙遙盡醉想流連。又何必歲云暮矣。始作一夕之周旋。

冰牀歌

水始凝冰牀行。其直如矢周九城。一夫曳繩雙足放。攤錢人坐冰牀上。似舟無楫車無輪。玻璃倒影鬚眉漾。路上行人看冰牀。共說冰牀穩如航。南船北馬相較量。安得大地冰全結。人行冰

上恣徜徉。奈何天不滿人願。驢夫駝駝與夫怨。我食其力何其艱。乃分我役攫我飯。可憐世鮮知足人。四時爾佔夏秋春。三冬能有幾昏晨。

十二月十九日坡公生日祀公於黃鶴樓歌

眉山父子吾瓣香。坡公吏事尤精詳。守徐治河績逾彰。功成樓起顏曰黃。卯君過此話連牀。二難詞翰各擅長。至今豐碑轟其旁。吾友繼公守此州。謂王子卿太守值公丙子懸弧秋。一觴爲壽躋子由。我嫌寡歡少其儔。當時龍虎賓朋稠。况兼作賦秦少遊。合當配食淵源留。

大熱戲占

避暑如蟲蟄。親朋莫叩關。最愁逢熱客。竟欲倚冰山。勢果衆人手威還。汗我顏。何當營一壑。高枕聽潺湲。

趙甌北先生與吾師那繹堂夫子向有內簾諸詠。余今秋執事至公堂。用其例爲外簾八首。

監臨

棘闈卿月有輝光。明遠樓高控院牆。號列東西尊北斗。簾分內外鎮中央。大官供饌支頭等。小吏傳聲立兩行。自是掄才關鉅典。夜深猶坐至公堂。

監試

列坐巍然獬豸冠。防維從古借臺端。龍門按簿稽名細。魚貫循行亂號難。約法章頻超漢制。族談禁更仿周官。由來課士深嚴地。賴有森森鐵面寒。

提調

紀綱誰領簿書繁。律例條條京兆存。納卷已先司士籍。出闈獨後絕羣喧。鵷行賓侶推東道。魚鑰深沈護北門。卻笑看人種桃李。自收落葉到黃昏。

受卷

三條燭盡漏聲殘。交卷紛紛出柵欄。郎署官剛容一坐。禹門浪已湧千攢。照籤未領頻頻喚。貼例先防細細看。此役過多功最少。況兼幾度廢晨餐。

彌封

莫厭多方令甲重。糊名例最重彌封。冬烘頭腦猜難著。姓氏親朋辨豈容。隱隱崑山藏玉石。茫茫大海混魚龍。憑教握尺量才者。摸索都從暗裏逢。

謄錄

珠玉泥沙卷幾千。易書從此判人天。純青卽是成丹候。欲赤何

妨近墨前絳帳應愁迷目易朱衣恰喜點頭便只憐無限抄胥
苦五夜燈紅滴露研

對讀

可是然藜夜校書呬唔坐對一窗虛荒儉半已成燕燭訛字猶
為辨魯魚文到驚人空擊節語堪捧腹且軒渠如何筆染鷺黃
色疑取梅花點額餘

收掌

籤分南北按房收堆案時如束筭投未許別裁區贖鼎先教朱
墨畫鴻溝我空守黑盈千卷誰定出藍勝一籌就裏升沈緣底

事烟雲過眼總悠悠

哭初頤園師

五十年來嶽嶽身巖廊風骨見嶙峋三朝遇 奎城千載一
代如公有幾人老尙 賜環知 眷渥閒仍 詔精鑿家貧今
上元年師尙謫員外郎不數日擢至大司空致仕猶給俸
臣 雲中箕尾前因在終始無慚古大

卅載難酬一顧恩事探今古每深論人嫌夏日逢皆畏我覺春
風坐最温遺草口占還戀 闕藏書手護待招魂師去秋以遺
疏大意屬侍
云他無所憾惟藏書散佚可惜侍 傷心易簣彌留際獨有彭宣
為購回數種而自是遂不復見

哭寢門

師屬續時獨侍簡及一見

乙酉除夕用香山體寄適齋在齋兩弟

荏苒光陰去日多。平生通計未蹉跎。屠蘇最後應輸我。仕宦爭先不羨他。已看飛騰過杜老。更誇長健比東坡。獨憐雁影分翔處。五嶺迢迢接兩河。

悠悠人海換流年。久宦如家此數椽。閒與孫枝同守歲。臥看兒輩去朝天。世間樂事無窮盡。心上愁思有萬千。何日故園賦歸隱。夜窗風雨一牀聯。

消夏雜詠 鈔三

天中節過尙微涼。檢點消閒卻掃方。病後正宜衣著裕。靜來偏覺漏添長。書求善本讎魚豕。花爲新栽課雨暘。門外車塵迎面起。奈余無夢到黃梁。

韋曲城南歲月遙。數椽老屋禾飄飄。頻年作客違吾土。久宦如家感聖朝。堂上舊巢來社燕。庭前高樹有鳴蜩。香山好句題中隱。不用頻煩猿鶴招。

朱藤幹老似盤虬。匝地濃陰綠蔭稠。一枕羲皇容我嬾。多年風雨有賓留。謀篇屢改疵仍在。餽釀新來病乍瘳。道是家貧殊不惡。頻看葦屋等山邱。

送高初亭同年出守雷州

京華幾度數晨昏。同譜交遊老至論。笑我興來頻訪戴。多君燭
盡獨留髡。男兒志大須千載。世事談深付一尊。知爾欲行猶小
住。春明門外最銷魂。

同人集余雙清館詠冰魚限冰字

嚴冬風雪正憑陵。白小魚偏負凍升。腰佩似懸三品帶。頭銜宜
署一條冰。銀刀斫膾如炊玉。碧沼求鮮感叩凌。疑是水晶宮闕
味。玻璃傾酒醉還能。

唐花

深紅淺碧洗輕塵。幻出陽和冰雪晨。向暖不隨春作伴。衝寒豈
是熱因人。開時疑試華清浴。種日誰留劫火身。莫待東風誇爛
漫。須知此亦化工神。

天工人力總模糊。一樣精神香色俱。要與素娥同耐冷。恰如紅
袖愛當鑪。芳心已閱炎涼徧。笑靨全無寒暖殊。蝶夢尙酣蜂睡
穩。祇宜伴我飲屠蘇。

戊子季冬李紫庭同年見貽二律依韻奉和

卅載同年鬢已華。悠悠人海尙浮家。不堪強盡紅兒酒。媿說曾
看紫陌花。往事重論如隔世。當時歧路歎三叉。多君佳句頻相

贈珍重親籠壁上紗

聚散從來有定因。一樽相對劇情親。歡逢舊雨忘長夜。細數晨星尚幾人。勸善頻聞規我過。投醪最愛飲君醕。明朝更擬看花約。正是新回黍谷春。

辛卯長至。餘原舉消寒第一集。申甫為圖紀以長律三首。

余亦作二首。綴於簡末。

匆匆物候逐時新。又見陽回子夜春。至日從頭剛九數。同年屈指不多人。漸看白雪都盈鬢。誰向青雲早致身。最羨休文將六。十宮花一品奉雙親。謂節原

一夕圍爐笑語喧。登盤相戒祇粗餐。談多驚座無嫌放。酒已傾壺尚許溫。人海流年駒過影。天涯舊跡爪留痕。歲寒剩此同心友。漫把升沈子細論。

消寒五集和紫庭韻

咫尺無煩走遠筒。羨君卽席語偏工。嚴天小集宜長夜。我輩論詩少變風。得意句成浮大白。傳花人至露輕紅。誰知庶子春華意。都付沈吟一笑中。謂吾園侍讀時將升庶子

張三營飲梨花春酒。同熊介之龔闇齋兩禮部。張棠村戶

部玉賜山余鷺門兩比部同作。鈔一

青山彎轉酒旗斜。見說村名一百家。地又名一百家誰信荒寒螿螿寒也。儲春雨釀梨花。

芍藥

天生名種色香殊。清供偏宜晚景娛。爲婢不甘甘殿後。居然似我飲屠蘇。

馬毓林

字西園。又字柳村。號雪漁。商河人。仲牧公子。嘉慶戊辰進士。官至雲南知府。著萬里吟詩集鴻泥雜誌。

行宣化關

讀文不行山。精神究疲倦。行山不讀文。未知文境變。文章與遨遊。事理同一綫。我行宣化關。迴環足跡徧。險峻得未曾。心慌目亦眩。頓悟作文訣。平地開生面。亂石排谿硤。白雲遮片片。恰如筆陣雄。異彩毫端絢。天外飛奇峯。驚雷復掣電。山勢踞千古。宏詞經百鍊。倚側籃輿中。儼同破萬卷。轉瞬來平途。餘味曾猶戀。

水車歌

有水有水非順流。涓涓直上歸田疇。有車有車不行陸。運轉何用駕黃犢。無轆無軾並無箱。祇有一輪廣且長。旁以雜篠爲之幅。橫安巨軸居中央。以竹爲筒間木片。斜縛輪邊拖水面。刮水

入筒轉至巔。倒灌槽池順而便。乃知水利權可操。注茲挹彼農
功高。謀晴問雨計原拙。轆轤終日何其勞。此車一出做者衆。臨
河紛然講罄控。惜哉未免機心多。漢陰老人仍抱甕。

青華洞

洞在雲南縣屬。卽道書三十六洞天之一。

馳驅未絕緇塵緣。終朝竭蹶攀峯巔。千巖萬壑看已厭。何期靈
境來眼前。青華古蹟在邊徼。名居三十六洞天。洞口排列參差
出。中藏曲徑相鉤連。窈然深邃似幽谷。累累石柱從空懸。柱上
有文如篆隸。紋理古奧環雲烟。最奇天窗透巔頂。微明一點瞻

星躔。龜牀玉局不可見。石罅到處飛流泉。陰陽互根包元妙。形
同太極聯坤乾。大厦千間奚足比。瑤房瓊室何加焉。書生眼界
頓開拓。恍惚欲拍洪崖肩。仰視絕壁揮文藻。淋漓大筆咸雕鐫。
古稱福地非虛語。長生於此求真詮。徘徊頻作凌雲想。誰謂世
界無神仙。

望雪山

造物鍾靈何奇絕。重岡疊嶂境界別。青蒼山色嫌雷同。故使神
工堆玉屑。巨津郡北環羣峯。獨有一峯呈皎潔。晶瑩照眼天風
寒。巒頂不化千年雪。由雪得名峙西陲。終古縞素冰霜結。恍如

晴雲一片空際橫。氤氳莫肯歸巖穴。又如琉璃世界無纖塵。瓊瑤上下皆澄澈。色相豈因時序更。皜皜何虞驕陽烈。朝暎未上生空明。黑夜忽驚月光徹。玉龍飛舞鬪蒼冥。白戰無須持寸鐵。瑩然遙觀松柏青。素萼梅花宜點綴。我來瞻望心神清。扶筇還愁屐齒折。頽然老矣嗟白頭。拱揖欲向白頭說。生平淡耳嗤紛華。冷面原不因人熱。見此如逢貧賤交。願與唱酬盟晚節。濁醪一斗詢山靈。駐顏可有長生訣。

沈湘浦以白雲歌見示。因賦長句以酬。

見山不見雲。嵐氣朝夕曛。見雲不見山。靉隸遮青鬢。有時雲與

山並見。巖谷層疊開生面。恰如山外添奇峯。俄頃之間形百變。我友湘浦參化機。凭軒日望白雲歸。觸石出岫看窈窕。會心常與雲俱飛。高唱入雲賦長句。豪情直欲留雲住。雲來雲去無成心。誰識奇人有奇趣。擊我劍讀君歌。浮雲富貴當如何。酌君酒頻搔首。自愧不如烟霞叟。白頭老書生。風塵日奔走。既無坡公瓊樓玉宇之雄詞。又無青蓮醉後揮毫之大斗。惟願與君並上南山巔。芒鞋筇杖凌風烟。攜取白雲兩袖滿。歸來自築停雲館。對雲與君相唱酬。何事求封萬戶侯。

安莊坡卽景

不識黔西路。扶搖上翠微。泉聲穿澗出。雲氣傍人飛。竹木涵新雨。牛羊散落暉。問誰此棲隱。白晝掩柴扉。

琅鹽井

聚落山坳裏。居民數百家。板橋低拂水。菜圃晚生花。農樸田多闕。岡平路未遮。邊疆有幽趣。相賞在天涯。

觀音山旅次夜雨

薄暮寒威逼。孤蹤宿驛亭。雲迷山徑黑。雨冷壁燈青。火種宵中盡。泉聲枕上聽。所嗟行役苦。浪跡似飄萍。

石龍關

鳥道懸空石磴遙。籃輿縹緲入青霄。梯山有徑來邊地。叱馭無驚托聖朝。萬里襟懷隨日擴。一肩行李帶雲挑。臣心平坦何愁險。又聽濤聲度斷橋。

小春念六日抵麗視事。見年歲豐稔。漢夷安恬。喜賦七律。

四章以見志 鈔二

鼓角聲隨絃誦音。西陲武備氣嚴森。經生豈識籌邊策。壯士頗懷報國心。慷慨有情思倚劍。昇平無事欲彈琴。須知鎮靜方爲福。忠信常書座右箴。

邊城草木燦雲霞。衢巷高低路未遐。北望雪峯飛玉屑。東流麗

水見金沙。庭前時噪呼晴鳥。階下猶開耐冷花。衙鼓聲稀長日靜。羈人渾忘在天涯。

新春卽事簡沈湘浦會和齋

匏繫無端俗慮紛。每依春色樂同羣。引泉頻灌牆陰竹。倚杖閒看屋角雲。恬靜夙欽曾子固。風流雅愛沈休文。雪山山上千秋雪。願貯冰壺贈與君。

秋程漫興

丙戌八月於役榆城途中無聊小吟消閒拈上下平爲三十首卽景書懷毫無章法率而錄出。不免爲大雅齒。

冷也 鈔四

秋蘭爲佩感離騷。冷淡孤蹤莫自豪。望遠身無雙鳳翼。論人品似九牛毛。愁中對客言常寡。病後登程力太勞。多少幽懷誰解釋。暫時相遣醉村醪。

飛蓬歲月任銷磨。回首光陰去已多。作客半生如寄耳。浮家萬里奈愁何。才疎敢望鸚驅雀。政拙難期虎渡河。馳逐風塵資老健。遵循王道喜無頗。

言愁潑墨興初酣。不把閒情問蔚藍。頻購野花稱益壽。偶栽嘉卉說宜男。名心已淡應知退。直道難容欲學愁。記取蠻荒風土

異他年細與故人談

職守邊城歲月淹。心情無那客愁添。偶因排悶思紅友。每欲除煩覓黑甜。一室裁詩嗟落落。十年占易佩謙謙。近來頗有林泉興。爲看南山不下簾。

初秋同李隰臯表弟遊近華浦登大觀樓遠眺

綠楊陰裏繫扁舟。結伴憑臨百尺樓。穉榼青蒼通遠浦。峯巒濃淡接新秋。千年往事旌旗歇。終古寒潮日夜浮。宦海茫茫何處濟。天涯迴望只生愁。

不盡山隈與水隈。生平眼界此間開。階前葉向三秋落。樓上人

從萬里來。禪院蒼涼環竹樹。野田高下傍池臺。多情宋玉頗懷古。慨想當年鐵柱才。壁上有宋芷灣觀察題句

正月十四日冒雨過鸚鵡關

無端風雨客情淒。強策肩輿越澗谿。水瀉崖巔愁路滑。雲橫嶺半見山低。平林霧重遮人面。仄徑泥深沒馬蹏。莫怪禽言行不得。銷魂此日楚雄西。

感懷

頻從葑屋問桑麻。萬里雲山宦作家。老態漸添新白髮。塵緣難卻舊烏紗。民淳最喜人遵路。事簡常催吏放衙。多少幽懷誰得

正定詩集金
解可憐。羈跡在天涯。

蘆花四首 鈔二

寒塘潮落水平鋪。穗結叢叢兩岸蘆。半夜琵琶人去未。遙天風
雨雁銜無。誰將衰柳同題詠。好共殘荷入畫圖。太息鬢毛蒼似
爾。廿年秋色憶明湖。
浩渺烟波望不分。江湖搖落太紛紛。愁添鷺夢渾如雪。老結鷗
盟盡化雲。十畝春出應賦彼。一方秋水正思君。那堪荻管頻吹
後。惆悵橫塘日又曛。

山村桃花盛放

柴門曲徑野人家。幾樹紅霞傍水涯。多少春光誰管領。更無人
面映桃花。

楚南舟中雜咏

水邊籬落柳千條。隔岸人家路不遙。微雨初晴春日暖。綠陰深
處賣魚苗。

林端烟火隱樓臺。峭壁峻嶒石徑開。恰好帆隨湘水轉。青山一
角上船來。

王爰瀚

字沛源。海豐人。諸生。

閒居

門無客刺省招邀。鎮日孤村伴寂寥。細雨潛通山腹氣。狂飈斜
激海門潮。參差村落牛羊聚。高下園林草木凋。散步平原時縱
目。又隨新月過河橋。

王惟誠

字孚遠。亦字弗園。號逸齋。海豐人。淑虞公子。嘉慶戊辰
舉人。歷官廣西布政使。太僕寺卿。郡志名臣傳。惟誠以
拔貢授銓曹。中戊辰
鄉魁。擢郎官。在部十九年。遇事侃侃。辨論雖長。官不為
屈。不察察為明。而亂法之吏。不敢負綠為奸。會卸某守
謝儀。並拒商人以金關說。公事廉正之名大著。任松江
守。下車卽汰鹽規。終任闔郡無控漕之案。江南頌廉明。

馬。晉福建糧道。補浙江溫處道。秉滇臬。四載。獄多平反。
開藩粵西。改佐貳。越次升署之。習內擢。同卿以請。養繼
母解組。卒於家。

泊舟湘陰遇雪

連夜瀟湘雨。嚴寒氣未降。凍雲迷葦岸。飛雪壓蓬窗。雁陣橫空
直。漁梁躍影雙。蕭閒蓑笠客。羨爾釣滄江。

泊武昌城外

高閣凌虛雲外浮。晴川黃鶴各千秋。我來亦有登臨興。怕惹鄉
心不上樓。

馬翊宸

武定詩讀少

卷十一

七

原名苔字次谿商河人嘉慶己巳進士官太平知縣工公
善善畫畫多寫意水墨花卉草草落筆自饒天趣與李馥堂黃瘦瓢堪伯仲詩未見全稿僅見題畫數首存之

題花卉

菜花

插籬當雞犬直到菜熟時此中真意味未許他人知

菊花

久依彭澤令霜後看花嬌善體東君意從來不折腰

王惟詢

字星轅號小華海豐人淑虞公子嘉慶辛未進士官至

浙江按察使

郡志名臣傳惟詢以嘉慶丁卯鄉薦第

辛巳典試貴州轉右贊善出守建甯以講學與士為治
閩中稱賢守焉擢江西糧道轉兩浙運使調浙江臬使
以德清徐蔡氏命案屢檢獄未成上命公往鞠之公
密訪得其情急思平反而巡撫及原檢官力持不可公
恚甚曰此冤獄也不平反安用臬司為公體素弱盛憂
心傷遽卒巡撫上其事宣廟震怒命侍郎王鼎往讞
悉如公議巡撫以下視職遣戍有差

丙子題詣園先生玉堂清課圖

芸牋一幅寫蓬瀛絕妙丹青點染成曲水閒情逸少序名園雅
集米顛評當時詞翰高羣玉今日神仙半列卿二十三年圖畫
裏丰姿喜未改平生

題徐晴圃方伯拈花圖

蘭室生香久耐尋。騷人幾度入高陰。隨時種去皆天趣。一笑拈來總佛心。

李維

字心田。霑化人。野田公弟。嘉慶癸酉舉人。

寄野田兄

愛杜堂中兄弟宜。海濱遙望不勝思。春明結伴看花去。猶是聯牀夜話時。

岳鎮東

字青峯。號魯山。利津人。嘉慶丁丑進士。由庶吉士官蓋

平知縣。

過屈平祠懷古

南楚孤臣獨抱忠。行吟澤畔寄漁翁。千秋哀怨流湘水。一卷離騷補國風。悲咽女嬃神共泣。香分宋豔曲同工。幽蘭芳芷今猶馥。誰識三閭恨不窮。

長沙懷古

年少陳書策。治安肯隨絳灌列。朝端會聞宣室疇。咨切旋謫長沙遇。合難湘水騷人同。灑淚洛陽博士笑。彈冠誰憐太傅才。堪

惜。惟有坡公論不刊。

高容聲

字佩蒼。利津人。嘉慶己卯進士。由吏部主事。官至鎮江

知府。郡志。容聲操銓衡二十年。一秉至公。書吏不敢舞。數十隻。專司拯救。溺人舊例。拯一活人。賞銀一兩。拯一死人。賞銀二兩。意本為溺屍多。不肯用力。拯援故。賞資獨加。迺好徒。惟利是視。每於救出之人生者。而致死之。因酌改。無論生死。均賞銀一兩。五錢。由是夙弊斷絕。凡各屬詳司案件。必親提覆訊。以成信讞。以此得平反者甚多。郡治南。陬亂山中有豪猾。傳習邪教。不下千百人。聲訪知。輕騎滅從。潛至其處。曉以大義。但懲治其渠魁。餘黨悉散。在任三年。引疾歸。

李太白匡山讀書歌

長庚星精鍾唐李。蔚出仙才猶未已。釣鼈撈月幾經年。仙蹤想像留遺址。大匡山峨嵋旁。匡廬峯接潯陽。俱言此老開書堂。渾如爭墩論不定。傳聞附會難考證。我思謫仙人間汗漫遊。齊魯燕趙任去留。江漢淮泗同拍浮。徂徠山下客。洞庭湖邊舟。天津濟上兩酒樓。扶醉沈香亭畔去。獲譴不辭夜郎流。無地不堪資吟嘯。氣橫四海凌九州。何必借重名山托迹方千秋。鬱積磅礴空所有。直上青天酌北斗。俯仰今古何茫茫。魯連接輿皆吾友。明知人哲保身。大隱小隱非吾願。酒隱三千六百旬。大兒郭汾陽。小兒賀季真。餘子瑣瑣溷風塵。世人但驚詩無敵。不知此乃

武定詩經金
餘爪鱗長空駕去千有年。書堂一龕空雲烟。天姥夢遊幾時還。
長庚耿耿終古懸青天。

趙瑄

字奉璋。利津人。諸生。

重遊盧龍南臺寺

遊人看青山。一見一回好。青山笑遊人。一見一回老。

趙塘

字温伯。利津人。嘉慶庚辰進士官大興知縣。郡志循良傳塘著宛

縣時政平訟理獄無繫囚旋任廣昌捐俸捕蝗躬臨阡陌是歲竟稔後任盧龍捐俸改建義舍旋調大興丁憂

歸里以疾終

題李崧甫竹林雅集圖

開緘展未終。肅肅生清響。非關湍石激。非關風竹盪。高咏夏琳琅。入耳音泱泱。肺腑凝清華。恍如餐朝沆。我家濟水濱。滄波恣混漾。諸季每同遊。聯吟互競爽。一從官四方。簿書日鞅掌。讀罷一喟然。臨風懷吾黨。

盧龍光

字臥廬。利津人。恩貢。

重遊南臺寺

不逢山中人。猶識山中路。知否翠微西。桃花紅幾樹。

張鴻

字信堂。號得桷。又號柳吟。海豐人。怡菴公從姪。貢生。候

選員外郎。著小榆書室詩草。

公幼席豐厚。不理家計。惟耽吟詠。晚年家道中落。餬口四方。處之泰然而耽詩。彌甚。詩多七律。蓋從白陸得門徑者。

玉環山歌

君不見東瀛衙齋築山腰。林深夏夜風蕭蕭。蕭蕭風作獅子吼。山月近人照白首。月下流雲隨風走。海上驚濤隔翠微。羣峯難障寒聲飛。水氣凌空人濕衣。衣濕爭倚百尺樹。樹色模糊濃積

霧。羊角風吹霧仍住。雪浪銀濤千萬層。羣鳥衆怪飛且騰。誰能拔劍屠長鯨。我思乘風挂帆去。圓嶠方壺問前路。吁嗟乎人在十丈紅塵中。可許遊到神仙處。

聞鐘

古剎知何處。鐘聲出密林。孤舟離合夢。清夜利名心。疏答潮歸。遙催月上岑。震聾開覺路。孰悟去來今。

題沈石田畫元亮時還讀我書圖

竹素傳高致。柴桑一徑斜。羲皇新甲子。圖史舊生涯。春日當門柳。秋風隱士花。遺蹤留尺幅。眞賞屬方家。

除夕喜男循徵自西域至
予子從戎久荒陬耐苦辛一年除此夕萬里到歸人沙磧迢迢
路冰霜閱歷身不吹鄒衍律寒谷自回春

和方立之秋夜韻

風戰長林葉膏焚午夜檠雲孤蟾弄影秋老雁含情何處疏砧
動誰家短笛橫唱酬愧珠玉敲句倚檐楹

春日詠懷

落拓生平兩鬢催硯田拙守笑庸才詩能抒性無新句酒可祛
愁有舊醅春色宛隨流水去花香如送美人來閒中風味今纔

解機事機心一掃開

桃陽別墅敬賦別墅者怕菴叔父所築佚老地也

小築芳園遠市塵天懷常抱十分春桃花以外渾無事茆屋之
中大有入晝永翻書如訪舊夜深邀月自成鄰武陵仙境高軒
過爭羨源頭去問津

晉武陵源隸辰州境昔年叔父權郡篆兩至其地

聽鶯

天涯芳訊遞黃鸝淑氣催鳴那許遲紫陌騷懷攜酒聽青春愁
緒訴花知嫣然柳色初藏處沃若桑陰乍止時滑到十分何所
擬琵琶絃急四條絲

聞燕

當窗語軟不聞譁。引得紅妝捲碧紗。別殿仙姿呼趙女。畫梁春
信洩盧家。含情底事穿楊柳。索解端應屬杏花。有客登堂巢下
聽。聲聲頓覺觸芳華。

春草

蒙茸細葉忽迴環。鬢影輕分鏡裏顏。翠黛四時描漢冢。香茵萬
里繡秦關。平原湛露牛羊健。古戍斜陽騶駟閒。如借階前盈尺
地。青袍底事戀空山。

落花

孰挽花光駐少時。已違高幹落難遲。豔情偏到濃極謝。春恨多
從過後知。不盡餘霞驚綺散。無垠殘夢有香隨。可憐陌上尋芳
伴。尙說遊疆昔並騎。

寄鄭姬蘭心

忽賦歸與匹馬行。何如前月共郵程。鏡臺風雨深閨夢。嶺路烟
霞倦客情。水照鬢絲殊愧我。山含眉黛似逢卿。嬌癡小女須調
護。著意寒衾喚母聲。

弔項王墓步韻

力能扛鼎竟亡身。白骨誰埋赤帝塵。劍舞季鶩三尺見。羹分翁

恍一杯真魚書未必墟秦業。猴冠何容誚楚人。子弟兵奔姬效命。虞兮無那夜歌頻。

勝敗興亡莫更論。英雄蓋世氣常存。五年創伯無疆土。一炬成功但墓門。垓下軍孤空飲泣。江東老在孰招魂。客來惆悵重瞳子。斷碣臨流月色昏。

舟次阻雨

石尤風急作驚波。天塹橫分奈客何。惜別情如雲影重。思鄉愁迸雨聲多。蓬窗排悶惟詩卷。沙岸騁懷任嘯歌。會看輕帆懸曉霽。晴江萬頃鏡新磨。

舟次阻雪

白下門邊白雪鋪。飛花入夜影模糊。五更氣逼羊裘冷。兩岸寒侵雀舫孤。倚枕尙攜南浦夢。揮毫欲作北風圖。凌晨便啟蓬窗看。六代青山半有無。

夏夜客館

棲似鷓鴣借一枝。羣山排闥綠參差。天炎嬾浴身多垢。夜短貪眠夢涉癡。豪興不須清濁酒。閒情偶寄古今詩。薰風潛入南窗下。松竹聲先報我知。

野花

胭脂零落徧天涯。消受青年自放花。微雨淡雲春一段。濃膏膩粉路三叉。香痕遙引尋芳履。豔影輕描越陌車。如此嫣然好顏色。閒閒落落屬誰家。

與李崑白外翰遊佛峪

看山不厭路迢迢。況是同心折簡招。深谷盤疑天入井。飛泉怒似海生潮。雲梯烟棧凌丹壁。雨榭風廊隱翠條。此景清幽曾未有。將軍粉本要重描。謂崑白

客居述懷

羈棲可奈雨絲斜。引我愁添兩鬢華。機息全忘居近市。交疏稀

見客停車。憑欄有意憐眠柳。倚幌無言悵落花。身在寰中渾似寄。不知何地再為家。

夜坐偶成

泡幻茫茫世事奇。書檠靜對動遐思。花鬚柳眼三春夢。利鎖名韁兩鬢絲。稱貸喜如潮應候。索逋愁似瘧符期。南華一卷儻能授。為蝶為周總不知。

初返厯下

舊榻棲遲夜漏沈。滇南燕北夢還尋。兒輩官遊南北三年客始歸三徑。萬里書真抵萬金。時得滇省家信貧久全消居室計。時違未悔好名心。

遊囊蕭索良滋愧。賸有江鄉一卷吟。

偶吟

旅館無聊默自量。舊年此日寓唐昌。昌化古名重經寒暑更新歲。未洗風塵尙異鄉。世上味難皆諫果。生前貧不到詩囊。當窗一樣無知物。巖石偏聞瀑水忙。

夏夜

新吟尋繹未成眠。籟寂深山夜悄然。雨足沙灘喧枕上。風迴譙鼓報鐘前。疏櫺月到如逢舊。高閣塵清欲叩禪。作止去留知數定。三生石證夙因緣。

蘭江舟次

又放蘭江黃蔑船。羣峯揖客續前緣。窮途嗣似登高第。時有故人贈贖歲官如種薄田。守拙笑成膠柱瑟。擇棲羞乏買山錢。萍蹤乍合皆同調。談讌蓬窗慮暫蠲。

題美人拈醪釀花圖

豔蕊拈來弱腕持。輕黃色似染鸞兒。情波一顧花含笑。到手春光肯贈誰。

春柳

小蠻腰瘦致纏綿。學舞東風得氣先。老樹未黃新樹綠。春光只

武定詩集金
合讓青年

新漲開匳一鏡磨。翠眉倒影照輕波。遠山黛擬張郎畫。惹得春愁分外多。

雨中登揚州舊城卽景

新漲無邊拍郡樓。綠楊低抱舊城頭。千年荒塚埋香草。疏雨斜風一段秋。
江都夢好入羣花。錦纜牽舟選館娃。紅粉宛隨流水去。有誰憑弔玉鉤斜。

書扇贈范小山

論交客路又歌驪。小扇新書贈別詩。比似江南紅豆子。祇應一摺一相思。

金閫卽景

左右臨波畫棟稠。河中處處泊吳舟。紙鳶欲試無餘地。索取春風上柁樓。

